

- पश्चिम एशिया मांय चाल रह्या तनाव रे चालता विदेश मंत्रालय एडवाइजरी जारी करी-जयपुर हवाई अड्डा माथे यात्रियां ने विमानन कम्पनियां सू उडान सू जुडी ताजा जाणकारी लेबा न कह्यो ।
- मुख्यमंत्री भजन लाल शर्मा समाज ने आगे बढ़ाबा खातर आध्यात्मिक चेतना ने महताउ बताया ।
- केन्द्रीय ऊर्जा मंत्री मनोहर लाल कह्या-देश मांय अबे जरूरत सू बत्ती बिजली मुहैया है ।
- प्रदेशभर मांय होली री रंगत सरू-राज्यपाल हरिभाऊ बागड़े प्रदेशवासियां ने रंगोत्सव री शुभकामनावां दी ।
- राज्य मांय गर्मी रो असर तेज-आवता हफता कम उं कम अर बत्ता उं बत्ता तापमान मांय 2 सू 3 डिग्री सेल्सियस री बढ़ोतरी रा आसार ।

000

पश्चिम एशिया मांय चाल रह्या तनाव रा ताजा घटनाकम ने देखता थकां विदेश मंत्रालय परामर्श जारी कर्यो हैं । ये परामर्श उण सगळा विदेशी नागरिका खातर जारी कर्या गया है जो वीजा विस्तार अर ठहराव ने नियमित करणो चावे है । मंत्रालय इण भांत रा नागरिकां ने नजदीकी विदेशी क्षेत्रीय पंजीकरण कार्यालय सू संपर्क करबा री सलाह दी है । इण खातर कार्यालय री वेबसाइट बीओआई डॉट जीओवी डॉट इन माथे भी संपर्क कर्यो जा सके है । इण बीच पश्चिमी एशिया मांय भारतीय दूतावास भारतीय नागरिकां सू परामर्श री पालना करबा री अरज की है । इण मांय सावधानी बरतबा अर गैर जरूरी आवाजाही सू बचबा ने कह्यो गयो है । यूएई, सऊदी अरब, कुवैत, जोर्डन लेबनॉन अर इराक समेत दूजा दूतावास आपात रा हालात खातर हेल्पलाइन नम्बर अर ई-मेल जारी कर्या है । अठीने जयपुर हवाई अड्डा माथे यात्रियां खातर हवाईयात्रा परामर्श जारी कर्यो गयो है । इण मांय कह्यो गयो है के पश्चिम री कानी उं जाबा वाळी उडाना मांय देरी व्हे सके है या टेम मांय बदलाव व्हे सके है । यात्रियां ने सलाह दी जावे है के वे हवाई अड्डा माथे जाबा सू पैली संबन्धित विमान कंपनी सू उडान रा बारा मांय ताजा जाणकारी लेवे । इण बीच ईरान रा ठावा नेता अयातुल्ला अली खामेनेई री अमरीका अर इस्राएल रा हवाई हमला मांय मौत रे पछे ईरान मांय 40 दिन रा राजकीय शोक रो एलान कर्यो गयो है ।

00000

मुख्यमंत्री भजनलाल शर्मा कह्या के समाज अर राष्ट्र ने आगे बढ़ाबा खातर आध्यात्मिक चेतना मेहताउ है । इण दिशा मांय जैन समुदाय री ध्यान, तपस्या अर आत्म चिंतन री परम्परा विश्व ने रास्तो दिखायो है । श्री शर्मा आज जयपुर मांय राख्या विश्व नवकार महामंत्र समारोह ने सम्बोधित करता थकां कह्या के राज्य सरकार प्रदेश रा विकास ने नई ऊंचाइयां माथे ले जाबा खातर जोर शोर सू काम कर री है । इण मांय जैन समेत सगळा दूजा समाजा री भागीदारी जरूरी है ।

000

कार्यक्रम मांय शामिल होबा सू पैली मुख्यमंत्री नवकार महामंत्र दिवस 2.0 रा प्रचार-प्रसार खातर रथां ने हरी झंडी दिखा र रवाना कर्या

000

केन्द्रीय ऊर्जा मंत्री मनोहर लाल कह्यो के देश मांय अबे जरूरत उं बत्ती बिजली मुहैया है। आज नई दिल्ली मांय ऊर्जा दक्षता ब्यूरो रा 25वां थापना दिवस रे मौके वे कहया के आवता बरसा मांय बिजली री मांग बढ सके है। वे कहया के इण री पूर्ति खातर भारत ने आवता चार-पांच बरस मांय 30 गीगावाट न्यारी बिजली बणाबा री जरूरत पडेला।

000

श्री मनोहर लाल कहया के बरस 2005 सू 2020 रे बीच ग्रीनहाउस गैस बणबा मांय 35 फीसदी सू बत्ती री कमी आई है अर देश 50 फीसदी रा लक्ष्य री कानी बढ रहयो है।

0000

केन्द्रीय इलेक्ट्रॉनिकी अर सूचना प्रौद्योगिकी मंत्री अश्विनी वैष्णव कह्यो के आर्टिफिशियल इंटेलिजेंस, सेमीकंडक्टर अर इलेक्ट्रॉनिक विनिर्माण सू देश मांय तेजी सू विकास व्हेला। श्री वैष्णव आज गांधीनगर मांय गुजरात सेमीकनेक्ट सम्मेलन रा उद्घाटन रे मौके या बात कही। वणां सेमीकॉन रा पैला फेर री सफलता रो जिक करता थकां इण बात माथे जोर दियो के सेमीकॉन रा दूजा फेर री प्राथमिकता एक मजबूत डीप-टेक स्टार्टअप रो माहोल बणाणो है।

000

प्रदेश रो उद्योग अर वाणिज्य महकमो एक जिला- एक उत्पाद नीति अर एमएसएमई नीति 2024 री मंजूरी प्रक्रिया मांय बडी फेरबदल करी है। आवेदकां री सुविधा ने ध्यान मांय राखता थकां अबे इण दोन्यूं योजनावां रे तैत आवण वाळा आवेदकां री जांच मंजूरी री कार्यवाही जिला उद्योग अर वाणिज्य केन्द्रां रा महाप्रबन्धक री कानी उं करी जा सकेला। उद्योग अर वाणिज्य आयुक्त सुरेश ओला रे मुजब इण बदलाव सू आवेदन रा निस्तारण मांय तेजी आवेला अर बत्ता उं बत्ता लोगां ने फायदो मिल सकेला। बतायो जावे है के एक जिला-एक उत्पाद नीति रे तैत सगळा जिला मांय एक-एक उत्पाद री पिछाण करी गई है, जिण रे तैत सूक्ष्म अर लघु उद्योगां ने 20 लाख रूप्या ताई री मर्जिन मनी अनुदान दियो जावे है।

0000

केन्द्रीय अप्रत्यक्ष कर अर सीमा-शुल्क बोर्ड पात्र निर्माता आयातक खातर सीमा-शुल्क रा तुरंत भुगतान सू छूट री सुविधा सरू करी है। वित्त मंत्रालय कह्यो के इण सुविधा खातर काल उं ऑनलाइन आवेदन करया जा सकेला। आ सुविधा 31 मार्च ताई चालेला। बोर्ड इण री अधिसूचना जारी कर दी है। अधिसूचना रे मुजब अबे पात्र निर्माता आयातक निकासी री टेम सीमा-शुल्क रो भुगतान तुरंत करया बगैर भी आयातित वस्तु ले जा सकेला। इण चीजां माथे लागू शुल्क रो भुगतान मासिक आधार माथे करयो जा सकेला। इण सू निर्मातां ने नकदी अर कार्यशील पूंजी बणाया राखबा मांय इमदाद मिलेला।

0000

प्रदेशभर मांय होलिका दहन अर धुलंडी खातर जोर शोर सू तैयारियां चाल री है। बाजार रंग-गुलाल अर पिचकारियां सू सज्या है। झुन्झुनू जिला रा नवलगढ कस्बा मांय होली रे चालता काडया जाबा वाळा गेर जुलूस बाबत प्रशासन तैयारियां पूरी कर ली है। कानून व्यवस्था बणाया राखबा खातर पुलिस आज सातवों फ्लैग मार्च काड्यो। वठीने पाली मांय भी होली रे चालता बाजारां मांय घणी रोनक है। अठे मंदिरां मांय फागोत्सव चाल रहया है। बृज हलका भरतपुर मांय भी होली री रंगत जम री है।

000

राज्यपाल हरिभाऊ बागडे होली अर धुलंडी रा त्यौहार री प्रदेशवासियां ने शुभकामनावां दी। वणां रंगां रा इण तिंवार ने हिलमिल र मनाता थकां आपसी भाईचारा अर प्रेम ऊं होळी खेलबा री अरज करी।

00000

प्रदेश मांय बत्ती ठोडां माथे गर्मी रो असर सरू व्हे गयो है। लारला कुछ एक दिनां उं बत्ती ठोडां माथे दिन रो तापमान 30 डिग्री सेल्सियस उं बत्तो दर्ज करयो जा रहयो है। लारला 24 घंटां मांय प्रदेश मांय सब उं बत्तो 35 दशमलव 3 डिग्री सेल्सियस तापमान

सीकर रा फतेहपुर मांय दर्ज कर्यो गयो । बाङ्मेर मांय बत्तो तापमान 35 डिग्री सेल्सियस दर्ज कर्यो गयो । मौसम केन्द्र जयपुर रे मुजब राज्य रा बत्ता हलकां मांय आवता एक हफता ताई मौसम सूखो रेह सके है । अठे कम उं कम अर बत्ता उं बत्ता तापमान मांय 2 सूं 3 डिग्री सेल्सियस रे बढोतरी रा आसार है । वठीने मार्च रा पैला हफता मांय तापमान 31 सूं 37 डिग्री सेल्सियस रे बीच रेह सके है । वठीने महकमो मार्च रा तीसरा हफता मांय कुछ एक हलका मांय लू चालबा रा हालात बताया है ।

0000

आईसीसी टी-20 क्रिकेट वर्ल्ड कप मांय आज भारत रो मुकाबलो वेस्टइंडीज सूं व्हेला । ओ मैच अब सूं थोडी देर पछे कोलकाता रा ईडन गार्डन स्टेडियम मांय खेल्यो जावेला । टी-20 विश्व कप रो सेमीफाइनल इण महीना रे 4 अर 5 तारीख ने व्हेलो । वठीने खिताबी टक्कर 8 मार्च ने व्हेला ।

000